

2136 / Moreau 821 (12 font.)

LE
COVRIER
DE
LA COVR,

PORTANT LES NOVVELLES
de S. Germain, depuis le 15. Mars
1649. iusques au 22.




A PARIS,
Chez DENYS LANGLOIS, au mont S. Hilaire,
à l'Enseigne du Pelican.

M. DC. XLIX.
AVEC PERMISSION.

Aduis au Lecteur.

MESSIEURS,

Puis que tout le monde se mesle de vous donner des nouvelles, i'ay crû que vous ne trouueriez pas mauuais que ie vous fisse part de celles que i'ay apprises depuis huit jours, si elles vous sont agreables ie tascheray par la suite de celles qui viendront à ma connoissance, de contenter vostre curiosité. Mais n'attendez de moy, ny de grandes prefaces, ny des paroles estudiées, & moins encore des loüanges ou des inuectiues affectées. Je laisse ces petits soins à ceux qui veulent remplir leurs feüilles à quelque prix que ce soit, ou qui establisent leur gloire sur des papiers volans, & leur fortune sur la faueur. Pour moy, comme mon mestier est de courir, ie ne scaurois m'attacher qu'aux choses necessaires, les digressions, qui sont à peine suportables dans vn corps d'histoire, me semblent trop ennuyeuses dans vn journal pour vous en presenter dans celui-cy: & la verité est assés belle pour n'auoir pas besoin d'ornement estranger. Si vous trouuez que ie me sois trompé en quelque chose, donnez moy moyen de me tromper moins à l'auenir. L'Imprimeur receura vos auis quand il vous plaira de nous en faire part, & le public vous en sera obligé avec moy.



LE

COVRRIER DE LA COVR.

PORTANT LES NOUVELLES

de S. Germain, depuis le 15. Mars

1649. iusques au 22.



A Conferencè pour la Paix du Royaume, & l'approche des Troupes de part & d'autre pour la Guerre du dehors, ont fait à la Cour presque tout l'entretien de cette sepmaine, aussi bien qu'à Paris. En voicy le détail.

Lundy 15. de ce mois on sçeut qu'il auoit esté arresté au Parlement que les mesmes Deputez de la Compagnie viendroient faire instance pour la Reuocation de quatre Articles du Traité de Ruel, sçauoir sur ceux de la Seance du Parlement à S. Germain pour vn liët de Iustice, de la cessation des Assemblées durant cette année, des prests sur les Tailles, & autres reuenus du Roy, & de la reddition de la Bastille : & de plus pour obtenir vn plus grand éclaircissement sur la conseruation des interests des Princes & Seigneurs vnis avec le Parlement.

Ce mesme iour le Regiment de Persan, & autres troupes qui estoient sorties de S. Denys, & des autres postes, sous la conduite du Maréchal Du-Plessis-Praslin, eurent ordre de retourner en leurs premiers Quartiers.

Mardy 16. les treize Deputez du Parlement ayant reçu les Passe-ports necessaires, tant pour eux, que pour quatre Enuoyez des Generaux de Paris, se rendirent presque tous à Ruel, où ils coucherent, mais non pas lesdits Enuoyez : les Generaux s'étans contentez de remettre les Cayers de leurs pretentions entre les mains de Monsieur le Premier President.

Le mesme iour on eut nouuelles que les Ennemis estoient entrez bien auant dans la Picardie.

Mercredy 17. Monsieur le Tellier fut à Ruel voir les Deputez du Parle-

4
ment sur les 9. heures du matin, sans doute pour les conduire de se transporter à S. Germain, & regler le temps & le lieu de la Conference.

L'Aprèsdisnée les Deputez s'estants rendus à S. Germain, furent faire compliment à la Reyne dans son Cabinet, & en suite allerent chez Monsieur le Chancelier, où la Conference fut ouuerte entre les Ministres & eux, sans l'intervention de Monsieur le Duc d'Orleans, de Monsieur le Prince, ny du Cardinal Mazarin. La premiere chose qui fut proposée par les Deputez du Parlement, fut vne suspension d'armes pour trois iours: durant laquelle toutes sortes de personnes & de denrées pourroient aller & venir librement, sans que d'un costé ny d'autre on exerçast aucun acte d'hostilité: Ce qui fut conclu, & les ordres donnez pour cela.

Le mesme iour il arriva des Courriers & Espions qui assuerent que l'Avantgarde de l'Armée de l'Archiduc estoit arrivée à Crecy en Lannois à cinq ou six lieues de Soissons, composée de trois mille Chevaux (y compris mille Dragons) & deux mille Fantassins, que le Marquis de Nermonstier y estoit, & qu'on disoit que le reste de l'Armée suivoit, que quelques-uns font plus grande, les autres moindre.

On eut en mesme temps des Lettres de Lorraine, portans que l'Avantgarde de l'Armée du General Erlach estoit en marche pour entrer dans la Champagne: qu'il y avoit neuf Regiments de Cavalerie, & que le tout se montoit à plus de quatre mille hommes. On dit aussi qu'Erlach escrivoit que le reste de ses troupes qui faisoient environ six mil hommes, devoit suivre de près l'Avantgarde, & confirmoit la retraite de Monsieur le Maréchal de Turenne au delà du Rhin, sans troupes, son armée l'ayant presque entièrement abandonné.

On parle diversement de la Landgraue de Hesse: les uns voulans qu'elle ait promis ses troupes à la Reyne, les autres qu'elle en ait baillé partie au Prince de Talmond son gendre, qui prend qualité de Prince de Tarente, pour venir soutenir le party où Monsieur de la Trimouille son pere est engagé: & les mieux informez disans qu'elle a promis seulement de s'employer envers les Chefs qu'elle licentiera, en execution de la Paix d'Allemagne, pour les engager à servir la France: mais que ses troupes, aussi bien que celle des autres Princes d'Allemagne estant licentiées, seront à qui plus leur donnera. De cette façon il y a grande apparence que la France & l'Espagne en auront, l'une & l'autre Couronne ayant envoyé de l'argent sur les lieux pour cet effet. Mais il est à craindre que les Espagnols en auront davantage, parce qu'ils y ont envoyé un peu plus d'argent, & qu'ils ont des Quartiers d'Hyver ou Rendez-vous à leur donner plus près de leurs Postes.

On dit de plus, que la Reyne de Suede envoie deux mille Chevaux à la Reyne: Et d'autre-part que Madame de Cheureuse negotie fort avec les Hollandois pour les obliger à donner un puissant secours au Parlement, que quelques-uns font monter à huit mille hommes. Mais tout cela n'est pas encore bien assuré.

Jeudy

Le Jedy 18. dans la Conference qui fut tenue chez Monsieur le Chancelier, les Députez du Parlement, sans faire mention des 4. articles, dont ils devoient demander la reformation, afin de monstrer que ce n'estoit point pour leur interest qu'ils estoient venus, proposerent seulement les demandes des Princes & Seigneurs: dont les principales estoient;

Pour Monsieur le Prince de Conty vne place de seureté en son Gouvernement de Champagne, l'entrée au Conseil d'enhaut, comme estant due à sa naissance, & la reparation des Halles & autres lieux ruinez dans la ville de S. Denis.

Pour Monsieur le Duc d'Elbeuf le payement des Arrerages deus depuis long-temps de la pension promise à Madame sa femme sœur du feu Roy, par son Contrat de mariage.

Pour Monsieur le Duc de Beaufort, qu'on rendist à Monsieur le Duc de Vandosme, son pere, le Gouvernement de Bretagne, qui luy auoit esté donné par le Roy Henry IV. son pere, en faueur de son mariage, & dont il a esté depossédé par le Cardinal de Richelieu, avec promesse de deux cents mille escus, qu'il n'a point touchez; ou qu'on luy baillast l'Admirauté qui luy auoit esté promise en recompense dudit Gouvernement.

Pour Monsieur le Duc de la Trimouille, la restitution de la ville de Perpignan, & de tout le Comté de Roussillon, qu'il pretend luy appartenir du chef de sa bisayeule, qui estoit de la Maison d'Aragon, & heritiere de la branche des Roys de Naples de cette famille-là, en vertu de certaine clause d'un ancien Contrat de mariage. Mais pour ce point on croit que c'est plustost pour faire vn acte qui conserue à ce Seigneur le droit qu'il peut auoir, qu'en esperance d'obtenir sa demande, qu'il a fait faire cette proposition.

Pour Monsieur le Duc de Bouillon, qu'on fasse nouvelle estimation de la valeur de sa Principauté de Sedan, & qu'on luy donne recompense conformément à ce qu'on luy a promis: Et dautant que les terres qu'on luy a offertes pour son dédommagement, sont la pluspart dans l'Auuergne, qu'on luy en donne le Gouvernement, sauf à desinteresser celui qui en est pourueu.

Pour Monsieur le Marechal de la Motte, le payement de cent mille livres, dont il a vn breuet, & du reste des arrerages de son Duché de Cardonne, qu'on a perceus durant sa detention, avec la restitution du Gouvernement de la ville de Seur, ou Bellegarde en Bourgogne, qu'on luy a osté sans recompense, ou autre pareil.

Pour Monsieur le Prince de Marsillac, & le Marquis de Vitry des lettres de Duc & Pair, & le Tabouret pour leurs femmes dès à present, comme choses qui leur ont esté promises, sauf à demander l'enregistrement de leurs lettres après la Majorité seulement.

Il y a quelques autres demandes de moindre importance, toutes fondées sur pareilles raisons ou promesses de la Justice, desquelles neantmoins tous ces Seigneurs protestent de se remettre au Parlement.

Le mesme iour Madame de Montbazon fut à la Cour: On ne sçait pas

bien le sujet de son voyage. Mais il est certain que le Sieur de. . . . Lieutenant de Monsieur de Mont-bazon à Soissons, n'a pas deféré aux ordres qu'il a reçeus de la Cour, de remettre cette Ville-là au Marechal d'Estrée, qui est depuis 15. iours, ou trois semaines à Chauny, ou aux environs pour cét effet; & on apprehende à la Cour qu'il ne soit d'intelligence avec les Ennemis.

Ce iour le Marechal Duplessis-Praslin eut ordre de s'avancer avec la pluspart des vieux Regiments tirez de la pluspart des quartiers qui sont autour de Paris, faisant 5. à 6. mille hommes, du costé de Villiers-Costerets, pour aller au deuant des Ennemis, & leur empescher le passage de la riuere d'Aisne, & l'entrée de l'Isle de France, ou du moins les tenir en jalousie en attendant l'arrivée des troupes d'Étlaach.

Vendredi 19. les Députez du Parlement se rendirent à S. Germain, furent chez Monsieur le Chancelier, & dînerent à la Capitainerie. Les Députez des Princes y furent aussi, sçavoir Monsieur le Duc de Brissac, & les Sieurs de Barriere, & de Greycy, & mesme le Sieur d'Atonville enuoyé de Monsieur de Longueville; Mais il ne fut rien resolu, ny proposé de nouveau, à cause qu'on trouua bon d'attendre les Députez du Parlement de Rouen qu'on sçeut estre en chemin.

On se plaignit à la Cour des difficultez qu'on faisoit aux portes de Paris, de laisser sortir ceux qui se vouloient retirer, & qu'on les obligeoit à poursuiure des Passeports qui n'estoient accordez qu'avec peine, à cause que le Parlement n'en donnoit plus, mais les Generaux qui auoient fait redoubler la garde. On se plaignit encore du mauuais traitement qui auoit esté fait à quelques Allemands, & autres gens de guerre: Les Députez au contraire se plaignirent de ce qu'on arrestoit, & quel on traittoit mal ceux qui apportoit des viures à Paris, & que les Soldats continuoient de voler & de violer iusques aux portes de la Ville, nonobstant la trefve: Mais il fut respondu que ces choses se faisoient sans ordres, & qu'on ne pouoit pas empescher que quelques Soldats ne se débandassent, & ne commissent de pareilles violences à yne mousqueta-de de S. Germain mesme.

Nouvelles vintent de Munster que l'on commençoit d'exécuter le Traitté de la Paix d'Allemagne du costé des Suedois & des autres interessés, & qu'on s'estonnoit qu'on ne fist le mesme de la part de la France. Ce qui fit resoudre d'envoyer le Sieur de Vauteste, pour tenir la main à l'exécution des choses faites, au lieu du Marechal de Turenne qui en auoit receu l'ordre.

Le deuant expirer à minuit, fut renouvelée pour autres trois iours. A cause de l'absence de Monsieur d'Atonville, & de l'attente de Monsieur de Rouen, on ne fit rien dans la Conference, que s'entretenir, & d'autre s'y trouua, comme second Deputé des Princes.

Le 20. lettre du sieur Pardieu Gouverneur de Guise, par lequel il estoit dans l'Armée de l'Archevesque de Legues, qui estoit dans l'Armée de l'Archevesque de Legues, qu'il seroit bien aise de contribuer à la défaire des Espagnols, en remettant la

accorra.
La trefve.
Samedy 20.
des Deputez de Rou.
que le Comte de M.
vne.

Place pour la rançon : Mais qu'il auoit rescrit avec le mespris qu'il deuoit.

Huit bateaux chargés, sçauoir six de blé, & deux d'auoine, venans de Soissons pour Paris, furent arrestez au Pont de S. Germain par ordre de la Reine, dont les Marchands se plainquirent à quelques vns des Deputez du Parlement, qui traouillerent à les faire passer, mais ils ne peurent rien auancer pour ce iour.

Le bruit ayant couru que la ville de Tours s'estoit declarée pour Paris, & la cherté d'argent & de viures estant grande à S. Germain, Monsieur le Comte de S. Agnan se preparoit à ramener ses trois cents Cheuaux vers le pais Blaisois pour garder leurs maisons. On disoit que les Bourguignons venus au mandement de Monsieur le Prince, estoient sur le poinct de s'en retourner aussi chez eux faute d'argent.

On fit grand feste de la nouuelle qui arriva, que les troupes d'Erlach estoient arrivées en Champagne du costé de Ste Menehoud, & l'on croid qu'estant jointes à celles du Mareschal Du Plessis, elles seront plus que suffisantes pour faire teste aux gens de l'Archiduc.

Dimanche 21. Quoy que le sieur d'Atenuille eust dit que les Deputez du Parlement & de la Cour des Aydes de Rouen seroient sur les trois heures à S. Germain, ils ne sont point arriuez, & il n'a esté rien fait; Monsieur le Chancelier ayant dit qu'il n'estoit pas besoin de s'asseoir, puisque tout le monde n'y estoit pas, & qu'on asseuroit qu'ils y seroient dans la iournée. Ainsi la Conference a esté remise à demain Lundy huit heures du matin. Mais on sçeut que le iour precedent Monsieur le Prince de Conty auoit declaré au Parlement que tant luy, que tous les Seigneurs qui estoient avec luy, ayans enuoyé pour faire des Propositions, on pourroit croire qu'ils n'auoient autre but que leurs interets, & qu'afin que tout le monde sçeust qu'ils ne songeoient qu'au bien public, ils protestoient qu'ils se departoient volontiers des demandes qui les pouuoient regarder en particulier, pourueu que le Cardinal Mazarin se retirast, qui estoit vne chose qu'ils estimoient necessaire pour l'vtilité publique, aussi bien que pour la leur: Que neantmoins s'il y auoit tant de difficulté, que cela ne se püst obtenir sans mettre l'Estat en danger, ils s'en remettoient à ce que le Parlement trouueroit bon, de quoy il auoit demandé acte, qui luy fut enuoyé, & des Extraits du Registre enuoyez tant à Monsieur le premier President pour en estre auerty, qu'au Comte de Maure, pour en faire la Proposition.

Les Deputez du Parlement ayant pressé pour le passage libre des huit bateaux de Soissons, ont enfin obtenu avec beaucoup de peine, & contre les ordres de quelques vns, qu'on en laisseroit passer six, qu'ils ont eux-mesmes fait partir, & donné ordre qu'on en amene dauantage des mesmes lieux. Ceux-là seront demain à Paris, s'il n'y a eu ordre de les arrester à S. Cleu.

Il y a eu aujourd'huy dans quelques maisons des principales de la Cour, des cheuaux sellez, & des Cochers & postillons auertis de se tenir prests, sans toutefois auoir ordre de partir, ce qui fait croire que le Roy ne sera pas long temps icy.

La suspension doit finir demain au soir: il n'est pas croyable combien de gens en profitent, on ne voit autre chose sur le chemin de Paris que des carrosses pleins de personnes de condition, & des charriots chargez de bagage, qui sortent de la Ville.

E I N.

